

全

邊

略

記

全邊略記自序

嘗讀周禮職方氏掌天下之圖與其  
地辨其邦國都鄙四夷八蠻七閩五  
戎六狄之人民周知其利害包括紜  
繢詳哉其言之乃詩書訓誥動色治  
內春秋於夷狄以不治治之佳兵弗  
祥富強無迹尚矣受脰澤宮施於軍

禮文事武備聖人重焉書曰無怠無  
荒四夷來王詩曰方叔元老克壯其  
敵吁嗟乎豈不在帝臣哉粵稽輿圖  
幽冀燕并東遼西夏以及河西五郡  
所胥溺異類者若而年矣陽九訖元  
中華板板

高皇開運坐致廓清

文皇顯名威伸四駕戛絕千古振雪百

王

列宗伐興詰戎無逸啓聖教勤良在克  
艱矣夫式於帷幄之內決勝萬里之外  
其唯聰明睿知者乎中葉委裘調和將相  
則士可以豫附我

朝雖罷丞相府而絲綸樞密得其任者

心膂之於肢臂初不異也失之相始求之中貴中貴而賢甚能助相之贊而一不賢則必倒太阿持兵柄其流毒莫可補救故相者近而將者遠也將必倚相或倚中貴然後自必其命而大有為於疆場間此毋論將欺將怯將餉且腐聲其頂踵以結交為能

事即豪傑全材邁往不屑士無知已  
者用安所望得當以報故道隆則為  
知人道污則為私樹可弗慎與宣正  
以來世胄日替驕婪不習佩將軍卽  
專閫輒罔功而建采之權更始文吳  
吏援枹矢石重騎後先而薄書太薰  
內所以娛相者彌親外所以役將者

彌敦良家弟子貞試帖括不就棄而  
逃之於兜鍪夫文以氣節勝而武以  
血氣勝養之炙之者誰乎文與武漫  
與其實則苞苴筐篚不媒自爭奪其  
駿骨眩其皮相夫夫也一旦推之轂  
賜之尚方劍何以令一軍皆驚邪苟  
若而可莫知其非矣牛馬走而待罪

視草縉雲天啓之季幸而褫崇禎熹  
初幸而

賜環重有感於一彼一此之故恐人覬  
官非官負人也時情所競銓臺省散  
及粉署更異陟銓而牛馬走比鼈  
刀例多不予清要叨此署已踰分旅  
進旅退竊愧於衆蒐部中所云典故

惟堂稿而已多軼蝕即諸邊籌塞語  
充棟要領幾何而

歷朝實錄秘府莫繇徧誦于是據所管  
窺恒苦固陋略約其文仰見

廟笑淵謨有嚴有翼其中蓋臣哲士彞  
厥精白聲施爛然所為開中屯墾駒  
牧戍班車騎戈鉢火制烽燧版築輓

飛之法槩見大義倣率舊章可以為  
治若夫欺策忠勲怯邀勇錫羶且腐  
者登潔籍而被竒褒又或時至而畫  
已周事起而詭相蹈膽任扶衰中于  
求忮是則機務蹉蹉自指謀績不亦  
增拊髀之恨哉牛馬走出山日家廷  
尉命之曰毋曠職必正色以立於

朝而署中積習以舟旋當世為務牛馬  
走耻之乃絕于譽之途雖兩入而多  
迕也瘞曠寔甚別載視草是記也期  
無墮我大人之命

崇禎元年著雍執徐月次析木司馬  
尚書郎旼桐方孔炤謹述於職方  
司之澄清堂

皖城姚文退鑄

全邊略記再序

牛馬走之于司馬門也閭人多矣人將安歸乎歸于謀食而已矣聖人揅之曰敬事後食道固應爾習之陋也大文食小文大武食小武而文武相食交注乎軍民後之斯敬之矣謀之能工又能敬乎上慢下殘良乃沒產而墮防良乃喪

生而思亂邊腹交証始別募兵以禁之  
而私食滿則公食匱司馬門之責綦萬  
鈞之折牙矣服官者未必皆敬事即敬  
事而衆維干澤其壑難填從旁撓之以  
氣燄挾之以曲聽否則禍讐轡轉不見  
是圖動遭傾軋彼區々敬事之微終扼  
腕不竟其用士安能挽其波也然非司

馬門獨也才焉而未必用者以其食無  
多也故吐之用焉而未必才者以其食  
多且旨也故茹之夫群世謀食而莫知  
所挽是豈想光明俊偉之業哉嗟乎小  
人為之擣夷狄盜賊為之鼓攘焉爭  
以食為務烏注而不亂不得已而操一  
切之法內外休采猶然恩怨以附會之

之雖齊其剽末及其本也夫一切之法  
可以礪頑鈍不可以勸賢傑也

聖天子虛衷登明而後輔銓院樞之經領  
挈輔銓院樞布公延訪而後伯岳連帥  
之精神動相觀而善曉然

朝廷愛惜人材之教莫不洗濯于當世夫  
如是而文有債吏武有債帥他途倖竇

相率而恥之宣化於傳類中然後用人  
始得其理乎聖書例薄勿拘可也黃金  
不問出入可也謗書盈篋毋渝我息壤  
可也閭以外將軍制之可也寵倖者誅  
使百姓加勇焉可也二卵可勿棄而三  
北可拜也良吏二千石以下潢池可毋  
羨也凡此者所以破其文網察其生平

令賢傑得有以自見非熟吏治未清武  
功不競肉食者鄙又何間焉宋歐陽文  
忠準詔上書曰今所闕者不過曰無將  
也無兵也無財用也無禦戎之策也無  
可任之臣也五者陛下憂其未有臣謂  
今皆有之然陛下未得而用者未思其  
術也誠如文忠說則治之必有術

必有本有剽也。亦奚幸夫輔銓院樞多  
閱其人以礪其謀食者而勸其敬事何  
至一旦焉取未擇之才不才臨未經之  
任不任哉四方以無拂非獨司馬門之  
伐肆絕忽而已繇是論之所貴乎文相  
敬也。方孔炤再序

全邊略記目錄

卷之一

薊門略

居庸紫荆倒馬三關略在內

卷之二

大同略

雁門寧武偏頭三關略在內

卷之三

宣府略

卷之四

陝西延綏略

固原略在內

卷之五

甘肅略

嘉峪關略在內

卷之六

寧夏略

卷之七

蜀滇黔略

卷之八

兩廣略

湖廣土司在內

卷之九

海略

廣東福建浙江江南直山東北直

卷之十

遼東略

山海關略在內

卷之十一

腹裏略

北京南京湖廣浙江江西福建廣東廣西雲南貴州四川河南山西陝西

卷之十二

師中表

洪武元年止天啓七年有序

神勢圖

計十八圖有序

職方氏曰明興開

天一檄先播金臺肇

聖子續服之基。萬壽無疆。是以首出之在薊門。大師直下太原。旋驅脫列。次之以大同。迅掃竹真。次之以宣府。函谷丸泥。不戰而有截矣。次之以延綏。延綏廓清。次之以甘肅。賀蘭毳幕。遂空。次之以寧夏。夫固原雄鎮。築于景泰時。故不列之外邊也。柔遠人則西南夷不可罷。次之以蜀滇黔。獮猺種類夥矣。次之以兩廣。倭之天塹長矣。次之以海冀青之墟。

定陵恭已而治。維艱卒殯。斯未可與大寧河套度外。  
置也。遼恢則馬歸牛放矣。次之以遼東。若乃財  
賦所自出。政教所自起。務德而不務荒。則京營  
外衛有懸疣養癰之慮。次之以腹裏終焉。夫燕  
代谷遼寧慶秦晉諸藩並建時。

太祖典訓重邊竟以

帝鉞四征。武功百世。是以有師中表。臣哉鄰哉。大一  
統也。是以有神勢圖。表圖畢具。而久安長治之  
道覩矣。略也者。此其大略也。潤澤之要。存乎其

人

門婿孫 臨克咸

曹臺岳梁父全較

全邊略記目錄 終

全邊略記卷之一

桐城方孔炤潛夫

居庸紫荆倒馬三關在內

薊門畧

時維大明洪武元年歲在戊申六月。

高帝命大將軍達徐等議取元都先是

一歲

平定中原。

諭遣諸將馳檄齊魯河雒秦晉燕薊之人曰自古帝王臨御天下中國居內以制夷狄夷狄居外以奉中國未聞以夷狄居中國治天下者也自宋祚傾頽元以北狄入主中國四海內外罔不臣服此蓋人力實

乃天授。然達人志士。尚有冠裳倒置之嘆。自是以後。  
元之臣子。不遵祖訓。廢壞綱常。有如大德廢長立幼。  
泰定以臣弑君。天曆以弟醜兄。至于弟收兄妻子。烝  
父妾。上下相習。恬不爲恠。其於父子君臣夫婦長幼  
之倫。濁亂甚矣。夫人君者。斯民之宗主。廟廷者。天下  
之根本。禮義者。御世之大防。其所爲如彼。其可爲訓  
于天下後世哉。及其後嗣沈荒失君臣之道。又加以  
宰相專權。憲臺報怨。有司毒虐。於是人心離叛。天下  
兵起。使我中國之民。死者肝腦塗地。生者骨肉不相

保。雖因人事所致。實天厭夷德而棄之之時也。古云。  
胡虜無百年之運。驗之今日。信乎不謬。當此之時。天  
運循環。中原氣盛。億兆之中。當降生聖人。驅逐胡虜。  
恢復中華。立綱陳紀。救濟斯民。今一紀于茲。未聞有  
濟世安民者。徒使爾等戰戰兢兢。處於朝秦暮楚之  
地。誠可矜憫。方今河洛關陝。雖有數雄。忘中國祖宗  
之姓。反就胡虜禽獸之名。以爲美稱。假元號以濟私。  
恃有衆以要君。阻兵據險。互相吞噬。反爲生民之巨  
害。皆非華夏之主也。予本淮右布衣。因天下亂。爲衆

所推率師渡江。居金陵形勝之地。今十有三年。西抵巴蜀。東連滄海。南控閩越。漢汚湖湘。相淮徐邳。皆入版圖。奄及南方。盡爲我有。民稍安。食稍足。兵稍精。控弦執矢。目視中原。久無所主。深用痛心。予奉天承命。罔敢自安。方欲遣兵。北逐羣虜。拯生民於塗炭。復漢官之威儀。慮人民未知。反爲我讎。挈家北走。陷溺尤深。故先諭告。兵至民人勿避。予號令嚴肅。無秋毫之犯。歸我者永安於中華。背我者自竄于塞外。蓋中國之人。天必命中國之人以安之。夷狄何得而治。

哉。爾民其體之。如蒙古色目。雖非華夏族類。然同生天地之間。有能知禮義。願爲臣民者。與中夏之人撫養無異。於鑠哉。應乎天。順乎人。殷周之所以敷誥也。閏七月。大師會于臨清。進克通州。擒元梁王李羅。元主大懼。夜半逃去。如上都。八月。師入齊化門。斬其監國淮王帖木兒不花。丞相慶童平章迭兒等。禁士母暴。市肆安堵。二年春。元也速侵通州。曹良臣以千人却其萬騎。迨夏復至。上命將軍遇春常。以所部于太原者還禦之。命文忠李副焉。繇遵化度鹿嶺。敗元。

將于錦川獲以千計至大寧抵開平元主又奔北追  
斬慶生等進攻大興文忠設伏于歸路虜夜遁伏中  
斬鼎住得士萬人車萬輛馬牛羊五萬計振旅而旋  
秋七月師次柳河遇春暴卒上慟之甚文忠代將  
趨慶陽矣三年北平守禦華雲龍攻雲川獲元平章  
大兒忽答右丞哈海等自是小警亦聞備戍亦密矣  
乃頻年北伐十有四年沐英領兵出古北口獨當一  
面克嵩州高州諸部過駒驢河獲其知院李宣所部  
而還二十年置北平行都司于泰寧二十年永昌侯

玉藍定遠侯弼王等繇大寧至慶州下令軍中。矢地而飲之。抵捕魚兒海。偵虜主營。斬蠻子降其衆。主脫古思帖木兒與太子丞相等遁去。玉精騎追之。千餘里不及獲。其次子地保奴及故太子妃等百餘。吳王采兒只等二千九百九十四人。軍士男女七萬七千零口。璽圖書一百四十九牛羊馬駝十五萬計。遂班師。上宴諸將于奉天殿。賦平胡詩以賡之。時大軍之威既已震敗北胡。朮顏元帥等表附來朝。願服藩職。兀良哈古之山戎也。五代爲渾莫奚。爲契丹。至是

奉詔以其地置三衛焉。自全寧抵喜峰。近宣府。曰  
朵顏衛。自錦義歷廣寧。至遼河。曰泰寧衛。自黃泥踰  
瀋陽鐵嶺。至開原。曰福餘衛。卽其酋阿札失里等充  
指揮官。各率所部歲入貢。二十有三年。命燕王帥  
友德傅等軍出古北口。燕王約曰。吾與諸將軍受廓  
清之責。來地則曠矣。而耳目則蔽。胡爲乎中路。衆咸  
若遣騎哨之。知乃兒不花等施廬于迤都。天大雪。諸  
將難之。王曰。虜不虞雪。雪不虞虜。速趣之。隔一磧也。  
遣指揮觀童先焉。童子乃兒舊至。卽相抱持而泣。我

師已壓其營。虜大驚。欲勒馬走。童說以燕王威德毋恐。遂引見王。王降顏待之。賜之酒食。醉飽之。慰諭還營。虜大喜過望。比及營復召之來。如是者三。悉收其部落。馬駝牛羊而還。乃兒較三百餘人入朝。獻其牌印。以乃兒爲留守中衛指揮使。阿魯帖木兒爲燕山中衛指揮使。咬住爲副都御史。忽哥赤爲工部侍郎。賜衣鈔有差。建文四年。靖難革命。移東勝左衛于永平府。東勝右衛于遵化縣。徙行都司于保定。散布興營諸衛于京府之境。以大寧界兀良哈。始靖難師之。

南向也。首挾寧王入北平。召兀良諸部從行。軍中多有功舉以畀之。吁嗟乎。地險山川。惜矣哉。永樂元年。本雅失里阿魯台俱爲瓦刺所敗。奔竄臚朐河。將入寇。命淇國公福丘。武成侯聰王。同安侯真火。靖安侯忠。安平侯遠。李出塞。全軍皆沒。上大怒。下詔親征。命戶部尚書夏原吉議運餉。曰。武剛車足可輸運。然道遠力艱。緣途築城貯之。此法良便。原吉等議用車三萬輛。約運糧二十萬石。踵軍而行。過十日程。築一城。再十日程。再築之。諒留護軍。上曰可。二年二

月。車駕發北京。學士胡廣侍講楊榮金幼孜扈從。  
三月。車駕出塞。至清水源。其地斤鹹苦。士馬渴甚。  
翌日營西。忽有清泉湧焉。賴以沾足。賜名神應泉。次  
凌霄峰。望漠北而嘆曰。元盛時此地皆民居也。蕭條  
萬里。顧敢倔強哉。四月次玄石坡。銘之曰。維日月明。  
維天地壽。玄石勒銘。與之悠久。次長清塞。夜望北斗。  
在南。次潤潔海。五月至幹難河。元太祖始興之所也。  
本雅失里率衆拒戰。上麾前鋒一鼓敗之。本雅棄輜  
重而走。六月班師。至靖虜營。阿魯台復來戰。上率

精騎衝敗之。魯台遁焉。文擒胡山。銘曰。滻海爲鐸。天  
山爲鍔。一掃胡塵。永清沙漠。次清流泉。銘曰。於鑠六  
師。用殲醜虜。山高水清。永彰我武。旣而軍中乏食。  
上就軍中貸之。回之日。倍其酬。乃獲全濟。七月。車  
駕還北京。十二月。遣指揮本答哈阿升哥齋。勅諭福  
餘三衛。曰。昔兀良哈之衆。患苦韃靼之抄掠。歸附臣  
節。我高帝矜厥困窮。設衛授職。屬久叛去。及朕卽  
位。略其舊過。撫綏蕃息。厚矣。比者爾爲本雅失里所  
脇而掠。又者苦烈兒等給云市馬。實行窺伺。罪奚可

容。今諭悔過贖納。不然發誅。當文皇威加大漠。而其狡焉如此者。阿魯台納歟。且請約束吐蕃。并女直諸部。上問侍臣多請許之。黃淮曰。狼子奸謀耳。使各爲心。則易制。併爲一。則難圖矣。上曰。淮如立高岡。無遠不見。諸人如處平地已矣。乃不許。仁宗初卽位。勅凡良哈許其改過自新。仍其前貢。曰吾屈已哉。安百姓哉。宣德三年。上以秋高馬肥。欲親歷諸關。警飭兵備。勅塞義夏原吉楊士奇楊榮等扈從。八月。車駕渡潞河。蹕虹橋。九月入薊州。官耆朝。

上諭之曰。此漢漁陽郡也。昔張堪爲政。其民有樂不可支者。爾郡長而勉之。次石門喜峰口。守將奏兀良率萬騎侵邊。請徵兵。上曰。孽虜何能爲。若知朕來。當駭走。其擒之勿縱。此出喜峰。車不得方軌。騎不得並轡。期會大兵集。則緩矣。勅以鐵騎三千。衝枚歛甲。韜戈馳四十里。昧爽至寬河。虜望見。不爲意。意成卒悉衆戰。上分鐵騎爲兩翼。夾擊之。飛矢如雨。上手射其前鋒三人。應弦而殪。繼而神機銳疊之。虜大半死。餘悉潰走。上獨以百騎直之。黃龍旗見虜。

乃墮馬羅拜乞命。乃生縛其渠斬之。乙卯暨戊午。越五日。驛會州以重陽節大饗將士。仍捕潰衆俘之。上大喜。製詩歌慰勞軍中。越七日班師。百官進平胡表。車駕還京謁告。太廟朝。皇太后置酒上壽。七年成國公勇朱條上便宜八事。永樂之運糧口外也。供開平官軍而已。近失樽節而槩放之。則運不息。且如遼東極邊。且耕且守。其供不出于民。諸邊何不倣此。萬全轄洗馬林長安嶺黑峪口等月餉。宜于附近支之。開平糧支于獨石倉便。萬全左等糧支于宣

倉便。雲州赤城鷗鴟屯住之糧。支于懷來倉便。蔚州  
保安隆慶永寧所徵豆料。宜輸獨石倉便。宣府衛月  
糧。乞以其半折澗布便。蔚州調軍不應常住。宣宜令  
回衛屯田人歲納六石。各收于附近倉便。守城旗軍。  
亦宜摘撥于屯便。隆慶在腹。令罷禦歸屯便。懷來等  
摯家于順聖川牧馬。宜支于蔚倉便。其宣府廣昌軍  
調遼久不代。宜撤回便。上命行在戶部會議。從之。  
令郎中王良都督毛翔專屯務焉。正統初。泰寧頭目  
納哈出等。請使臣臨衛。狡也。上以遺生擾就令所

部約束之不用命者。禽請誅賞。乃又勅總兵王或。  
曰。近聞兀良哈泰寧朵顏福餘與瓦刺交歡。累入貢。  
覘我也。宜諭逢慶。逢警則有遣奏。非大頭目所差。其  
貢獻悉罷免。九年兀良哈等雖陽貢。屢寇遼東延安  
邊境。上怒其反覆。命成國公勇朱同太監僧保出  
喜峰。恭順侯克忠吳佐之。興安伯亨徐同太監曹吉  
祥出界嶺。都督馬亮同太監劉永誠。都督陳懷同太  
監但住出古北。各將萬人約至黃河。至河期而會。斯  
時也。物力充牣。精銳騁動。中涓侈談兵。專命出塞而

車駕北狩之禍伏矣。景泰初，兵尚書于謙定策應之略。自薊門始，以易州策紫荆關；以真保策倒馬關；如白羊、天壽、黃花警；則京師策之。廣昌及各關總會者，名選軍三千，委一都揮預之。鴈門關則專遊擊石虎策之。而虛其將軍揚能之身，相機策之。四年，命御史沈性自山海至豬圈，兵主事黃節自古北至白羊。陳銓自紫荆至十八盤，各巡其軍。都御史鄒來學奏：「古北潮河寬濶走沙，築垣無塞，請于京嚴大戰車，撥四十輛列之，以免倉卒從之。」泰寧輩于帖木兒上書。

云往者也先令我三衛擾邊。又召三衛爲彼役。我不敢背。願附塞居住。爲中國藩。並乞大寧廢城及甲盾。賜下兵部謙以爲詐也。帝曰。從之生釁。卽勿從。

失夷心。崇陽侯懋

陳

議糜之。譯以告曰。近塞圍獵。恐

不便于業。去塞二百里。可免疫甲。盾遇敵。奏而給之。

嗣是紫倒二關。則操民兵守矣。後免歸農。成化二年。

兵尚書馬昂以邊報繁。復二關民兵。六年守薊太監龔榮奏。福餘平章遣赤勞溫等報邊外情。下兵書白圭議。朶羅乃王。往年爲幹失帖木兒所敗。已奔卜刺

罕衛近報又云率衆東行此虜雖敗亡之餘而部落實多糾合醜類取采顏爲鄉導或有之矣幹失牧四萬于西北勢亦太甚其令薊及宣大各嚴之九年提督揮使吳廣提喜峰等關于貢者不時納俟其饑困徐晗以酒食與之質易取其良馬並胡豹皮比還又多取其寄畱餘馬及所賞彩綬輒爲阻抑三衛怨之屢犯掠逮廣治贓死于獄十二年薊總兵馮宗奏三衛與北虜通有日矣堡額二萬九千八百餘人逃者未捕乞于謫戍囚徒及雲廣遼人潛境內者乞容招

集。且喜峰羅文黃岸劉家石門一片桃林悉寇衝也。  
所屬舍餘民壯宜編伍教之冬則協春則免下部議  
格不盡行之兵侍郎馬文升議于永平孳牧馬內選  
牝千匹分給永寧監官軍三歲收其駒二大司馬頂  
忠是其說推而行之十四年古北城垣折五千五十  
丈敵樓圮二十三間水患也都御史汪霖已役境戍  
修之復請外衛秋班摘撥兼繕上是之英國憲時  
張總薦兵欲畱京操軍士勿佐工而量起民丁應役  
下部言民間歲饑役重卒難徵發仍摘京操甚便遂

從如例。蓋自是十餘年。太監汪直征伐宣大。而薊門亦尚緩矣。弘治初。都御史屠勲于猪圈更立二關。北曰北水谷。南曰南水谷。增墩守之。勲請馬蘭兵出境勦虜。以報密雲之役。部議參將吳劍王志伏于關內。擊其惰歸。乃有名母濫出以召釁。兵主事歐鉦奏密。雲亘千有餘里。戍軍僅五千餘。而潮河口濶一百七十丈。請摘焉。蘭燕河二邊官軍各一千五百助之。勅兵侍郎王宗彞工侍郎徐貫相度石城。增設兵備。使兼理永平諸屯。宗彞貫覆奏曰。潮河城之不便。增

戍。便。今。以。京。營。三。千。分。番。川。口。人。地。不。習。宜。掣。之。而。  
代。以。興。密。六。衛。附。近。者。州。縣。寄。養。之。馬。宜。充。密。雲。操。  
之。無。馬。者。響。水。谷。各。設。大。墩。上。屋。下。壕。各。謀。者。二。  
十。人。分。瞭。而。代。若。黃。花。之。用。京。營。外。衛。輪。班。每。失。常。期。  
請。如。例。撥。長。陵。等。衛。近。而。操。近。而。糧。益。而。鹽。菜。從。之。  
九。年。戶。部。奏。永。平。盧。龍。撫。寧。並。沿。邊。七。十八。處。官。軍。  
萬。六。千。餘。例。于。薊。州。支。糧。動。廢。時。日。帶。甲。榜。矣。以。永。  
平。之。運。薊。者。夏。秋。稅。三。萬。石。草。束。折。米。萬。石。量。發。薊。  
銀。易。米。五。萬。石。俱。存。附。近。冬。十一。月。至。夏。四。月。支。之。

以海運十四萬石折色光萬八千金解薦。夏五月至冬十一月支之報可時弘治十年始也。七月萬壽之貢不至部奏三衛啓疆之心徵焉馬蘭燕河之二營道遠莫致請暫設一遊擊駐于三屯添設協同駐于燕河別選遊兵三千駐建昌以應之命王果白琮協揚勝而定自去年秋及今十一年秋虜入密雲掠二十一人兵備張璉叅將吳玉自勑駐遊兵于建于密各三千犄角之罰九九而罷巡撫洪鐘奏潮河地皆流沙難于疏鑿請于開東二寨二寨之間其山外

峻內夷。鑿爲兩渠。以殺水勢。復砌堰引水。繇川中行。  
築關臺于堰上。守之以百人。虜不得衝突矣。永平逼  
虜。素無營壘。欲將遵化以東十四衛九百餘人。畱永  
從之。總兵蔣驥以隘兵弱。乞畱興營等衛三千。免其  
京操。而邊上山林蒙密。反滋虜窟。或築或芟。攸寧之  
策也。部從其請。十二年巡按高銓疏居庸關外東西  
隘各有蟻境焉。雖曰隆慶左右懷來永寧四衛爲腹  
然外口不密。賊騎竝進。誰能爲備。請以其京操二百  
五十人回其衛。以撥口巨馬河之北三里。地勢平展。

可築一城下視紫荆關戍之以壯關焉報可十一月  
大司馬馬文升奏弘治以來邊吏貪功啓釁遂致寇  
侵次密境二十四次蘭谷境七次燕河境十七如蹈  
無人久而習玩今馬步軍增至三萬五千而一虜無  
獲請督責總兵以下方略宜如宣大例分爲三路而  
大將軍居中熟計其要害十四年工科給事馬子聰  
等劾洪鐘鑿山改水功久不成上命錦衣牟斌往  
勘復遣太監李璋工侍張達往報鐘所鑿石洞泄小  
水耳夏秋溢石墜仍故道其地多沙耕種匪宜若其

修築石城長牆續可嘉也。兵科屈伸等劾鐘欺罔之罪有三。臺省交論請逮治之。尚書文升亦云鑿河之妄費不貲。壓震之嗟怨已極。詔罰鐘俸十七年。命工侍李燧。大理少吳一貫。通參叢蘭。經略邊關。燧起山海廟山至密墓田貫起黃花桃峪至居庸白羊堅子谷蘭起紫荆南山至倒馬之葦箔嶺。召至煖閣曰。爾等徃整之。增軍之少者。治吏之不職者。務圖久遠。勿爲虛應。各賜白金綬鈔以辭。燧奏古北及廟山垣一千五百餘里營堡一百四十餘多坍而衛卒

赴工未免重困。乞于順永輪班匠參之。以下班之軍  
協守之舍。而修築之。新立石匣等營。防守乏士。乞都  
揮張澄郭振所領軍分投布列不足者。召募以實之。  
制曰。核母冒十八年。采顏都督阿兒乞蠻使貢。言迄。  
北小王子欲妻以女。不從。願爲效順。太監陳榮以聞。  
降勅獎之。正德十年。軍務侍郎陳玉奏官軍四萬  
九千五十餘逃者七千餘令所占之役清還于伍。而  
類餘丁以補其役。燕河所轄五百餘里。非一人所能  
督。宜分擦崖迤及潘家營委之叅將張銘駐太平寨。

議允之。開御史張鰲山奏。撫守廵官各住一方。兵分  
力寡。而號令二三。遵化一城適中。請併治于此。近年  
衛弁假托軍政。取回不及原額之半。故在京冗貟甚  
多。而邊受其弊。自今請勿取。駐牧熟夷。叩關乞鹽米。  
而架砲之夜不收。反出其外。染習華風。熟知要害。速  
宜遠之。初花當子把兒孫千騎毀鮀魚關垣而入。遂  
寇馬蘭。參將陳乾指揮談茂。馬英死之。侍郎王。巡撫  
王倬報虜五百騎入板塲。千騎入神山。千騎入水洞。  
于是以桂勇充督僉。統西官廳之三千。河保達官三

千往禦之。而恤蔭乾等。采顏督花當令子。把真打哈齋。番文謝魚關之犯。願貢馬十匹服罪。而通事王遠孟昇宣諭有功。部議把兒孫雖暫遜。仍宜拘治爲誠。保定撫周季鳳與工侍沈東魁。爭盜採之禁。曰易州廠炭薪。雖稱出廣昌蔚州靈丘。而奸商憚遠涉。乃盜之。紫荆倒馬。皆禁山也。一障之一。一伐之法弛矣。議從鳳言。嘉靖九年。薊糧儲主事康河言。本折之。賴倒也。官軍四萬二千有奇。春夏本色。秋冬折色例也。外解不時銀米兩乏。如遇支折之月。而左藏無鋌。顧乃賤。

難以取盈。及其支本之月。而運撥愆期。顧乃增價以  
傾橐。每歲無名之費。四萬二千餘金。良可惜省乞  
勅監兌。遮洋海運。以七月爲率。抵薦候給。大計禪矣。  
報如議。廵按周釋疏。請各邊中官既革。則石門內臣  
不宜獨存。朶顏之種。花當已死。其次子把兒孫亦故。  
宜早定其嫡孫革蘭台銷攘竊者心懷戎至計也。夜  
不收所繫至重。宜拔其趨厚其實。恤其死事者。然後  
可責其刺探微密。豫識虜情。緣邊無武學。宜廣設之。  
使知禮義之道。韜鈴之紀也。可之。自把兒孫之犯遼

也。其零騎闖于薊。屯于石塘。御史聞人詮條其敝。曰。  
將之有統。將之紀也。建昌備本屬燕河。而妄稱專勅。  
曰我遊兵也。聽部符而已。黃花備本屬密雲。而各自  
立統。大水峪之寇譖焉。奪氣喪師。職此之故。戍守之  
役。非土著不能知其險。非恒業不能固其心。如黃花  
渤海最要害。而老家軍士。不過一二百人。雖班卒踐  
更。曾無厲志。建昌營舊倚中貴人私之。習成悍驕矣。  
似宜遷于七陵之軍。雜于三戍地。而給之田廬。然  
後順其情而銷其獷。天津六衛之班。何不解發其免。

操之餓。補新舊軍之衣器。誠兩得也。馬永肅陞其才堪總戎。請遣大臣專督。特爲振作。上嘉納施行之。時新任大將軍卜雲遠在甘肅。以提督東官廳總兵官張輓署之上。便宜七事。一。關伍。二。選壯。三。增墩。四。嚴哨。五。併村。六。掘窖。七。召補。從之。命給事中曾忭勘。薦撫王大用。叅將袁繼勲等。先後失事狀。奏記曰。薦失之大者五。一犯冷口擦崖者。朵顏夷打哈也。罪在大帥楊鎮。通事王遠。貪鄙乖張。不恤貢襲之宜。三犯大喜峰者。打哈倡之。而脫木濟之。罪在撫臣王大用。

謬憑故牘。經營霧靈山。妄開馬市。遂啓戎心。先經兵  
墳。効罷矣。五犯黃花。俱野達通漢老。究爲之。此夷非  
隙。特防疎耳。疏下都察院。逮問擬遣有差。初正德  
車駕之巡幸也。中貴監守官各開按伏行糧之例。冒  
費無筭。後都御汪玉革之。至是撫張嵩創于石塘之  
警。奏復其例。凡馬蘭等營出入九十里外。按伏者仍  
支糧以行。十六年塞天壽山黃花路口。塞之誠是也。  
總督侍郎胡守中大專精于石匣。以爲潮河。墻子之  
中區也。喜峰貢路也。故有來遠樓可容萬人。水噉而

未葺夷人過其下曰樓猶如此豈能伐我哉革蘭台  
驍勇絕倫私與北虜和親日事鈔略密口之去小王  
子牧地一二日程耳臣以身臨邊宣諭威德請特頒  
綵段犒之禮部議革蘭台補貢旣赦後期之誅復加  
殊格之賞此舉自邊臣行之猶恐遂例若以降解出  
關頒于天旨長驚滋貪犬羊無饑從之時守中于  
本兵張瓚深結禮尚嚴嵩被特簡受事則伐塞外古  
松數萬株沒帑金以媚內大貽虜害復索富商宿將  
多金御史洪源科王燁劾之及大敗逮訊論斬六月

大同虜謀沓至。大司馬策總兵祝雄駐密。叅將王繼祖伏古北遊擊毛尚忠守白羊。遼東將趙國忠駐寧遠。河南撫駐懷慶。山東撫駐臨清。東西廳駐通州。紫荆兵師周徹駐保定爲涿州慮。本兵率大營駐崇文三門外。保定撫丁汝夔請畱定州茂山之班。以補紫荆。畱真定神武平定之班。以補龍泉。而以津河二衛之班分助之外援。則調大同之遊兵內防。則調薊遼之遊兵。迄于南至順廣。各以畱班撥之。仍給種馬于民兵。免其入解。乞帑十萬爲芻積。又接境山西舊無。

墩哨宜請增置。俱得旨。御史郝名言。黃花禪將縱役班軍。治裝索然。大損其舊。亟擇其精銳駐大水峪。用應三方之驚焉。二十三年。虜酋自通事寇黃崖。我軍敗之。復寇大水。我軍又射却之。都御許論。躬督戰。而副使喻智。守備張鳴謙。劉道等。咸有設奇之勳。升賞有差。兵書戴金。請修重關之險。遣侍郎路迎。往理宣大偏關。爲東密西荆之捍。覆議郭宗臯之疏。虜繇獨石四海治。則指密矣。繇青山犯喜峰。則指薊矣。薊故待檄于宣。爲率然勢。特練蘭谷等遊兵。從匣以壯。

密焉。防守之法。但嚴分子城堡。而公疎于邊墻。非策也。自夏初及冬初。議堡兵。畫牆正界。而出之以律。宗臯更請分主客兵。而東路西路。有那移之弊。奏乞京營三枝協之。而重定偵伺之賞。不爽者。例以擒斬優之。預擬借調之法。脫居庸有急。量調建屯。脫密雲有急。量調居庸之京兵。各允所請。總兵許國言。因地用兵。機宜乃合。庸荆二關。地勢險阻。不利馬利步。各馬五百步一千五百足矣。亦以宗臯之改大水峪也。衍宜騎。而建昌五百人則車。改渤海所也。峻宜步而騎。

兵三百則距。曷更易之。兩地悉便。其按伏之兵五百人回營練之。而聽警發之。給事諸葛峴有增官之議。本兵難之。日薊增設副總者二。叅將三。守備十有二。取遊兵于宣。爲天壽之援。布京營于兩關。伏鎗手于涿。似已周矣。二十五年。郭宗臯告急。請調允之。越年復奏乞勿調。請折其犒三萬金。發薊。而上伯革獲猛。革禿之勞。乞官其子。上曰。宗臯昨歲虛張虜勢。輒請京兵。今歲豈能預料無虞。輒擬止調。且京兵原不專爲薊設。胡乃輒扣犒募。若夷人獲功。國有常典。違。

例。濫擬殊輕肆邊寄。令革其職。巡撫孫應奎議。薊之通馬步隘口者凡九十九墩。垣之修者一萬七百一十二丈。秋防雖畢。夷報未靖。乞畱保定營兵。上駁之曰。邊自有主兵。嚴冬畱客兵。非體也。亟令掣回。二十八年侍郎范總經略薊事而言曰。潮河古道門外蜂窩增墩一設橋一兩山之對設敵臺二龍王師坡二寨加敵臺三各募勁卒戍之居庸關之外爲宣內地也。互推非法。宜下互策之令。如紫荆之桑谷倒馬之中。塞峪龍泉之陡石。故開之白灰溝。宜創城設險。

以佐各關之急。阜平縣之次溝有鑛焉。愚民聚爲亂。  
宜辦廵司覆可。保撫商大節。議掣通涿之戍。以還部  
議。薦急而保緩。母或二三以滋觀望。關御史姚一元。  
言薦軍之減也。撫賞累之也。往者賞不過鹽米。今益  
以牛羊幣筵。歲用萬四千金。將取之軍。軍貧輒亡去。  
公帑既不可支。官署之儲又無從措。不爲之所。軍日  
困矣。下部覆屬。夷每歲再貢。往者三四百金。取諸景  
忠山香課而足。今無慮數十倍。而隙掠較甚。陽順陰  
逆。良為撫賞太萎。威防不立。而典邊者藉口于掩捕。

誘襲之禁。顧忌因仍。致釀內患。其令非貢期者閉關。  
二十九年都御史汪汝孝憤三衛之索無厭也。嘗出境。撲殺之。諸夷以此蓄怨。猛可犯蘭谷。又犯河坊。前後斬二百餘級。盜雖再失利。然遂通北虜。潰古北矣。  
八月虜酋俺答。脫脫辛愛等。糾合。奪虜入犯宣府。不得入。遂擁衆窺大同。仇鸞奏虜東行。且犯宣蘭。恐近京師。請移師居庸以備不虞。及警報日亟。乃發諸邊京兵。共三萬六千。分布關隘。虜自宣府走薊塞。攻古北口。都御史王汝孝以火砲矢石下却之。虜乃佯督

衆綴我師而別從間道至黃榆溝。毀垣而入。汝孝兵大驚潰。虜轉掠懷柔順義。聞保定兵駐城中。遂逼通州。巡按王忬先期駐通牧漕舟艤潞河西。阻之不得渡。分掠密昌諸州縣。忬夜令人縋城走京師請援。

上聞遣都御史王儀以三千騎援通。而命文武大臣各十三人分守都城九門四塞。以吏部侍郎王邦瑞定西侯貴<sub>著</sub>總督之。虜大衆營白河東。仇鸞以大同兵二萬三千至。楊守謙以保定兵五千至。遊擊徐仁以延綏兵三千至。已而宣府山西遼陽各以兵至。凡

七鎮五萬人。拜鸞爲平虜大將軍。總諸軍事。賜襲衣  
玉帶。上尊千金。及密啓封記曰。朕所重惟卿一人。得  
密啓奏。以守謙爲兵部侍郎。提督團營駐師城下。以  
衛都城。復以陸炳督守城諸門。譏察非常。都御史商  
大節。督巡五城防內。署獄中邊將戴倫歐陽安。從  
戎以自贖。分遣京營兵屯内外巷陌間。京兵見敵輒  
之出。皆泣不前。時勤王兵皆輕騎不齊糗糧。上命  
犒牛酒諸費。戶部無所經。以文移往復之。三日後人  
纔得數餅。旣發粟而釜甑囊橐一無所藉。士卒饑疲。

甚。陸炳疏乏軍興。上怒。責計部不前定。李士翹等皆裸服視事。辛巳。虜北出河東。渡潞水西北行。大掠民貲焚其廬。火日夜燭天。至東直門執御廄內臣八人去。見俺酋跪坐氈帷。謂曰。若歸見天子。好爲我致書。及啓書多媿語。求入貢。上召嵩本階入便殿。授以劄。令各書所見。羣臣相顧。莫敢發。司業趙貞吉抗言。此不必問。恐後生懦夫闇於事。虜不舉入寇。震宮闈。乃許之貢。何異城下盟。不可。檢討毛起謂時事孔棘。宜暫許。俟出塞而後却之。貞吉叱起謬語。然中

貴人業已聞。大內矣。議奉入。時已暮。馳騎召吉至西苑。賜酒食。令條奏。貞吉大言。陛下宜御奉天下。非已詔。速獎故都督周尚文功。并釋沈東獄。以作人心。士卒不力。以主將多冒首功耳。今誠募一首。予百金。捐十萬金。虜且立盡。上卽詔擢貞吉兼御史。齎萬金往募首功。癸未虜繇鞏華城犯諸陵。轉掠西山。良鄉保定皆震。次日亭午。上出御奉天殿。勅責逮繫都御史王儀。王汝孝。總兵羅希韓。卽訊汝孝道梗不及逮。時儀在通州屯兵城外。而閉城固守。

會仇鸞兵掠食諸村。儀令人捕之。斃諸獄。鸞兵大譁爲御史所劾逮至以恆怯不戰削籍超遷巡按王忬爲僉都守通州時上下恬熙忽遘變大兵束手無措卽偵報無一當者。凡徃偵不十里遇避寇者訛言卽返報復遣一卒亦復爾日數十報卽城中數十驚于是大同軍故爲推髻掠村落無所忌卽捕之輒自詭曰遼東軍蓋朶顏諸部虜謀云導之入寇者也。鸞方蒙寵養人不敢忤大同軍而帝以其入援爲諸道先卽掠食足矜鸞亦自私其軍不繩以法。兵書丁

汝夔無可奈何。輒令曰勿捕大同軍。大同軍益驕而  
又自稱遼陽軍人。遂訪夔山東人。庇其鄉耳。及虜薄  
城。而汝夔受計於嵩。令諸將勿輕戰。虜飽自去耳。諸  
將固不敢戰。乃諉曰汝夔有禁勿戰語。稍稍聞禁。  
中而鬻率兵。故遠屯郊峒。虜薄城。楊守謙屯城下兵。  
少不敢擊。虜城中人人見之。而鬻遠避。無從驗。自謂  
擊虜酣戰。不能回薄城也。而虜多殘中貴庄墅。中貴  
遂訪汝夔。守謙貳於虜。帝乃命執汝夔下獄。而遣  
官自軍前逮守謙。卽訊丙戌刑部彭熙都察院屠僑

大理沈良才會訊汝夔守謙罪斬。具爰書少緩。帝坐齋宮趣其獄。不至。怒黜等比周。故緩獄以覩倅免。亦逮獄。與杖奪俸。時虜已東。京師解嚴。丁亥棄二臣于西市。梟以狗。時科臣按例三覆奏。帝亦杖之削籍。仍追理貞吉。廷議多骯髒。謂其狂誕。申理周尚文。沈東。而齋金不能得首功。杖九十。謫荔浦典史。己丑。虜將金帛人畜北去。欲西奪白羊口。出塞。而留餘衆城外。以疑我。會鸞率諸鎮兵尾之。阨險不得出。乃稍棄餘物。從東南行。至昌平猝與虜軍遇。縱騎蹂躪。鸞

軍創幾獲。鬻得裡將力援免。虜循古北口故道出塞。  
鬻先後得二百級。自効無功。帝詔進太保。賞齋甚  
渥。汝孝雖被逮未至。就軍中斬虜獲首功。比訊準後  
功。未減戍邊。九月辛卯。虜盡出塞。遣侍郎駱顥賑撫  
被虜郡縣掩骸埋胷。李士翹先以乏餉褫職。仍命削  
籍。郎中皆戍邊。初守謙之入援也。提精兵五千。上  
甚壯之。而輔嵩內譖心嫌其奉公也。故終以不全仇  
鬻。以他途獲寵。多綰軍國大議。鬻請徵邊兵入京。兵  
部曰。禦寇者不于門戶。而格鬪于堂奧。可乎。帝命

宣大二邊勿徵寇入犯卽星馳入援屬大將軍各邊  
共選六萬八千人班上京師與京營兵雜練於營諸  
將分詣各訓練十卒以備北伐。鸞請駐師宣大候冬  
月大舉伐虜。于是兵侍史道願整士馬。戶書孫應奎  
願備軍餉。工書胡松願利器械。乃命戶部括各省貯  
積追積逋以俟軍興。至是兵部調班軍三萬赴薊而  
鸞執爭之。上已可鸞不淮調矣。左侍郎史道奏邊  
牆限虜不爲無功。忽于修而怠于守何異因噎廢食  
耶。借役各府濟變之計也。上乃屬總督何棟築之。

鸞又奏。泰福二衛夷畏虜徙夾牆。宜撫回原衛牧住。  
如其寡弱。憚歸亦當計安插之。得旨下。何棟報奏。  
三衛各有分地。朶夷牧薊之邊。泰夷牧廣寧之邊。福  
夷牧開原之邊。近年小王子打來孫侵于三岔與泰  
讎殺。邇入夾牆亦已復故地矣。三衛貢口如常。初未  
告警。其在遼屬夷稱虜患者。卽二衛遷徙水草間。故  
靡常耳。無可安插。然互屠而不外附加撫爲宜。嗣備  
禦有功。如陞朵顏例。上允之。鸞又奏。朶顏影克哈  
哈赤哈舟兒陳通事。昨歲導虜犯順。及虜歟而復詭

焉。請加討。兵尚趙錦。總督棟。咸稱影克哈哈赤乃采  
酋也。受都督之職。一有搖動。諸酋俱叛。逼之合勢。如  
其勦入深陷。難保萬全。縱能一鼓殲除。徹屬夷而延  
北虜。草肥水緩。益彼南窺。爲計左矣。惟哈舟兒陳通  
事。咸我逋逃。爲之煽構。多方擒捕。用戒戎心。上乃  
從之。鬻又奏薊空矣。宜以大寧都司移植其地。如慮  
重遷。或以大寧所屬外衛班軍。免其京操。撥薊爲禦。  
部議移司較難。改操較易。春秋領班添設叅將十遊  
擊二分番赴邊。舊以薊分十區。區一叅戎轄之。有將

無兵定擬歸併而班軍三萬人授一室計費二十萬金汰老弱分衝僻嚴截殺戮殘賦遂定爲八區而督臣具上主客之數三十二年兵侍楊博兵書聶豹相與論昌平事不嫌鹽梅之濟焉博之言曰昌平都御苦無事權宜割涿霸十六州邑建之開府豹之言曰逆鸞之奏設昌平爲所私也自虜入患已分八區設總督軍門矣昌平都院革之便博又奏長峪鎮邊橫領三城宜設參將爲援許之是時虜勢甚熾朮夷喝索繁矣雖畱山海商稅佐之益不給遷卒出塞輒縛

之。臨關而叩贖。將校幸苟且。每斂軍資賄之去。其不得所賄。輒殺所執卒無忌。關御史楊金謂孽胡可長也。宜問之。不則閉關絕貢。部奏御史言是也。三十三年桃林叅將李意。購得寇通漢于獄。東西虜把都兒打來孫擁數萬。從虎山犯潮河及于。輒染吉了總戎周益昌禦之。丙寅攻龍王谷。益急。又分攻松嶺夜襲孤山。俱不克。我憑牆擊之。虜多傷者。丁卯虜薄古北。而大同平虜堡亦告警。是時虜百道進矣。上爲旰食。遣厥衛卒偵之。得楊博環甲登陴宿垣上。諸將力

禦狀。詞以實聞。上大喜。發萬金犒師。博益昌各賜服色以寵之。三十四年。虜萬騎犯馬蘭縣。寬佃入。參將趙傾葵指揮褚文明。李湘。周官。黃世勲。段起元。孫世爵。死之。總兵益昌從建昌引大兵至。虜引去。棄馬緣山磴而走。拾虜級二十餘馬。四百餘。總督侍郎王忬奏。薊畫地而守。定步按。定州等遊兵可減馬八千四百副。總王重祿可減馬三千五百。遂爲式。屬夷伯思哈兒窺邊。守備詹承恩出哨。盡殺之。還白忬。忬謂夷罪未明。承恩似專殺以釁。詔驗之。三十六年。把

都兒以數萬入流河口直犯永平遷安副帥蔣承勛力戰死之。二日出境上褒卹承勛而降罰。忼等會御史楊惟平勘疏謂忼飭戰誇功詔以自贖大學士嵩奏報曰虜乘流河牆缺乘虛狃于得利速核未完之工修築堅固亟練原營未宜專恃入衛而已京營數不足十萬應責戎政實操之。上問邊牆起于何時先代何策爲上今當遍閱焉嵩對五代時十六州之地遠矣太祖始入元君付大將軍達以修墮之任累朝加繕益嚴庚戌後議費百十萬極衝次衝

之口。旣報竣。桃林劉家以爲山險也。憤之。虜從僻入。此後疎者。治其董役之罪。人知警矣。兵書許綸條。七事以聞。自薊形勢與他邊異。他邊多有重關。如大同之三邊。陝西之固原。宣府之長安。延綏之夾牆。皆據層險。而都城根本之地。獨無虜卽揚鞭已闖其戶。漫無限隔。臣早晚思之。惟渤海所之南山陵之東。有蘇家口。實爲阨塞。直抵張灣百一十里。灣至通州北。塞離村四十里。白河水深沒馬。可據守焉。塞籬至蘇口七十里間。地形平湧。最爲虜衝。若築臺界牆。庶幾夾

制。不能直薄長驅也。命廷臣僉謀。允行之。三十七年。追論冒破修邊之罪。前侍郎吳嘉會黜爲民。何棟閑住。邵世勛等三百六十人。王臣等八十三人。悉薄治之。臺省萬民英袁汝是等。勘報之數。五十七萬三千有奇。已冒四分之一矣。楊博議以薦入衛。而調于宣大。主忼執之。上曰。分區練守。八年于茲。每遇秋防。第思多調邊兵。此豈遠謀。而且彼此紛爭矣。忼又請調遼步駐于馬蘭。上曰。遼饑甚。可復調耶。部科共酌以報。職方郎唐順之。復閔視之。命日。昔漢武以

漁陽突騎定天下。唐藩專制而盧龍一道虎視河北。士所謂其人慷慨勇悍而沈鬱卽今薦是也。以臣所見。尺籍耗減。除夜不收千人。屯建兩營。古燕兩區。撫標射手數百人之外。皆羸憊朽鈍。不濟緩急之用。近日寃佃河流之變。至於近檄宣遼。遠徵延固。甲胄蟻虱于道路。杼軸匱竭于轉輸。蓋積弊之極耳。練主減客。天制久頒。不謂仍徵發爲常。置主兵而不整。誰之咎也。今可練主一部。減客一部。期于主盡練矣。而免調爲長。大約馬步額九萬一千有奇。逃亡至二萬。

二千有奇。請治總督以下疎曠之罪。得嚴旨降。付等二級責。以三年有成。上問戶部以虛兵之數。尚書賈應春對以不知。上責之曰。所查五萬九千三十二名。文冊歷歷也。于是通檄覈之。諸弊始得。計因閭內閣邊兵入衛起。何時建白。何人大學士嵩對。祖宗時止有調赴土兵。各省殺賊之例。四征不庭。及于邊警。皆簡京軍而往。正德七年。劉賊陷入山東河南。始調許泰郤永領邊兵而逆。彬統宣大勁卒扈南巡之駕。此輩入窺京軍底弱。必驕橫內輕。隨有叛軍。

之變。識者憂之久矣。逆黨遣臺官四員分往各邊。遼入衛者十八枝。鬻自領之。名曰護陵。未日守薦也。何棟暫借二枝。至王忬乃盡調擺口。致賊乘虛入遼。禍實繇此。唐思遠矣。王忬議河南入衛。不如徵其歲費十萬來募之一也。擇勾之法。勾于軍則窘矣。土著流寓。豁其雜徭而抽之一也。清勾原籍。乞專勅稽之一也。造營房恤士矣。給荒地墾之一也。撫夷之費。如唐順之之策。歲給三萬金。一也。兵備楊胤賢。張子順。伊介夫。借寇一年。一也。逃亡士卒責其鈐轄官。以

五百爲升降一也。依議行三十八年。虜自遵化東掠至遷安西。至玉田等駐五日。薄暮趨鮀魚遯。詔御史查虜所從入。及守臣失事狀。御史方輅等奏黜虜屯會州。垂涎內地久矣。倉皇失策。以致荼毒不可言。飽利全歸。玩敵宜治。上逮忤于詔獄。司敗比宣督翟鵬陝督張珩例成之。上駁之棄市。都御王輪降二謫外。總兵歐陽安等下廵按逮問如律。忤輸事同而罪異者。賦嵩因賂高下焉故也。總督楊博著畫地秋防三令。兵備官各移駐控邊焉。天津雷夢麟駐石

塘密雲李尚智駐古北冀北董邦政駐牆子薊州伊  
介夫駐太平霸州溫景葵駐燕河昌平栗永仍駐昌  
平俟入冬解嚴以爲功罪博又畱延綏固原寧夏三  
營之軍爲春防計非計也七月把都兒犯薊西胡鎮  
擊破其前鋒于連陰復分犯沙嶺燕窩白允中等憑  
牆禦之乃引去是役也酋狃于舊六月尉州之獲而  
總督許論諜知其情半月前厚集以備故不得利論  
乃條上封事禦虜之策守險而已矣當於口外道旁  
對築敵臺去牆二十步而近置軍輪戍以火器夾擊

之。臺軍自取善地。與內守者。委襄斯固矣。職方郎王叔果復閱視之。命曰舊兵瘦勞饑渴弱而不能練。新兵烏合應募。驟而不暇練。邊城曹寨等遊兵。皆客居坐食。冗而不必練。貴先擇主將耳。將才則兵自精。如黃龍黃演七八人。悉貪庸不職。祝福雖廉。其才出于雲霄之下。詔以冒代福。而併提督之署焉。總督諭奏薊賞之無資也。率私貸募餉。減月餉以填之。此何異剝肉補瘡。勢必糜爛。請戶部歲額萬二千金。兵部更給馬價三千餘。則取之本邊軍租。贍餉及香課。母

累貧軍。自是。岡寺馬價爲漏卮之萌矣。時境外有闖入石門。攘牛者。酋長影克。及其弟。一凡魯思。以其牛還。縛盜者以獻。則被掠者也。賜酋衣幣。而赦被掠者二人。召博入掌大司馬。博具上略。日今之邊九。而薊其腹心也。永邵保。凡慎擺要。三部寇大同。而其酋俺答。黃台吉。把都兒。土蠻等。潛形不露。恐其窺薊深。莫先于逐大同之寇。清以壁之。伏以奇之。精以搗之。則薊勿能近矣。莫先于獨石之哨。所謂薦得其情。獨石得其形也。請責宣以偵馳之。且各區悉聽其宜。胡

爲督撫虛加逕制。不遙制而兵備之賞罰乃勵也。昌居于宣率相諉。袒其與懷。隆永治務明唇齒以維之。著令匹虜不入。俱授首功。如燕河之邇遼也。聞警赴援。其勿候徵。乃發于大司農請于年例外。加餉四萬兩。詔節之勿侵。兵郎中許汝驥奉閱旋奏記曰。薊之門兩焉。懷來海冶其居庸之外戶也。寧屯其山海之外戶也。戍屯一空。止恃叛服不常之屬夷爲蔽焉。可乎。薊之軍三焉。繼補者以丁繼丁。多脫籍而鮮實。召補者以人代役。率萃渙而易離。新募者設法克數。

多驕惰而難用。軍日衆。軍奸日滋。唐順之徐善慶選練之說。亦旣施行。而成效未睹。蓋六弊焉。私役賣閒。弊一。精卒健馬多爲大將親軍。獨遺老弱守邊。弊二。科歛無術。弊三。廢弁冗食。咸取之軍。弊四。屬夷挾賞。無厭。弊五。給餉不時。弊六。部堂列其說而益之曰。餘丁僥繼補之數。盡麗尺籍也。河南折衛之歲解。勿愆期也。憲臣勿攝副帥之署也。廢將宜驅逐故鄉也。以拒守匹馬不入爲首功也。椿朋之限。毋後時而追呼也。上覽奏革論任罷總兵張承勲等。下關臣治。

之撫院張玭降一調之委楊選以訓練總督選條奏  
日主兵不振者防守修工其餉獨薄加以撫夷之私  
扣逃亡行乞邊兵不振者陝綏所來羸馬殘械殆居  
其半班軍不振者寧山德州天津河通有春秋二班  
之名涿鹿四衛有下三千之名浮脆不武住者乏食  
募兵不振者舊四枝新二枝各利糧而已糧缺則煦  
煦慰拊猶虞溪散何暇教演哉餉運不振者主兵糧  
半出于民運客兵糧全出于內帑年終會計戶部類  
削之商價過期災沴歲被月給本色尚保一家月給

折色不贍一身。遲及四五閱月。甚矣。入衛動千萬里。  
離一二年。而一升五合之餐。半入糠粃。沙土如之。何  
不典甲賣衣餒而逃也。訓練不振者。大操迄事。無賞  
無罰。士藝何能得精。尖哨家丁不振者。無警無趕馬。  
之利。有警無斬獲之勞。將領不振者。臨陣逗遛。不斬。  
仍復夤緣地近輦下。輒干中貴。或抗忤執法。立見羣  
謗沸騰矣。馬匹不振者。折色每料九斗。折銀不過三  
錢。折不辨本之半。上憂之。詰兵部曰。薊臣遇警張  
皇。惟調客兵。初謂權宜。今已十一年。未聞減撤。不獨

煩費亦失人情。如何練主免客大破常格卿博宜竭忠謀別議以聞。博乃申前說爲上十事。大要免調延綏一枝而預防之策。請選京營爲八部。部足三千騎。居十一爲傳報步居十九爲列守。以春秋二季番戍近邊。庶勵近而恤遠也。封疆之臣。宜按行塞垣之外。相地戰守。毋恃邊牆。仍優哨瞭之賞。倣甘肅墊院之制。而貧軍隔數百里。僕食者應令餉司徃就而支之。上曰可。戶部議薊折色二十七萬九千有奇。民屯漕本色二十四萬七千餘石。庚戌以來漸加京運。增至

七十二萬有奇。空漕不與焉。伍缺營逃。則食宜羸。何乃稱不足耶。上曰楊選之急。在民運之逋也。還悉心計。選又奏。振起標兵之法。爲減入衛之張本也。請于綏同遊兵。選取三千。益以遼保募兵之三千。通分二部。優以本色。倍以馬鎧云。給事鄧棟奉查軍需耗侵。以巨萬計。曰舊督臣許論。餉司閭光潛之失也。籍既虛。丁復濫。主或代客而戰。客或代主以守。門皂輿承。盡食軍門之餉。商民將領胥成影射之風。上追治有差。選奏。民運所以瞻。主兵也。乏置動至數萬。何

也。攬收詎攫于姦民。逋數抗違于巨室。批關展轉于虛文。侵牟觀望于蠲免。此四者軍民之蠹也會。汎爽于成限。徵歛失于及時。比併混于無等。覈蠲徵之不實。稽銷註之欠嚴。追逋負之無法。屯租之弊甚于民糧。武弁不肖甚于有司。此六者官司之蠹也。上嚴飭。四十二年巡按溫如璋奏主兵之數已練者十之七矣。上喜賚選等銀幣焉。俄夷酋通漢叩開副帥胡鎮伏兵執之。通漢者辛愛之義齒父也。其子縛瘡老至牆下請易之。選乃悉數其罪而釋之。獨留通漢。

要以其子入質。令其諸子迭爲質。馳疏詣其略。上復錫以銀幣。十月丁卯。虜大入。潰墻子嶺。詔宣大總帥馬芳姜應熊劉漢祝福等速入援。以尚書江東統之。鎮遠侯寰顧集。京營分布十六門。上諭內閣曰。東見火光去都不遠。何不聞截殺耶。隨諭通灣二地急保之。以漢護京。以芳護陵。毋怠時。大帥胡鎮孫贗已赴通迎敵。有旨遣官齋餉犒之。博等奏。陛下恤諸將至此。士氣當益奮。諸大臣奉勅守門者。以調兵不至。疏劾博。夜呼崇文甚急。侍郎孫植以博。

習邊事。而疏必激。上怒。或本兵動搖。事且不測。乃大呼曰。兵至矣。俄而總督遷以虜東退聞。上疑之。問大學士階徐。曰。聞賊少退。恐詐也。而遷遂謂追殺果一行否。階曰。賊營在平谷。遷對果已往通。然謂之追送則可。謂之追殺則不可。上曰。然是送言殺其誰欺乎。兵今四集。遊戲場耳。庚戌之轍。又成故事。博等有甚奇謀。聞彼怯夜戰。何不夜攻取勝哉。皇高祖歲一巡邊。皇兄亦威振若彼。今內逆欺外。賊侮寧不可嘅。階乃馳告博。博上戰守十事。約徵大兵募。

敢死。擣虜巢。榜賞格。然酉已大掠順義三河已入日  
矣。分圍下店。裨將趙濤孫贗死之。大帥鎮潰圍出。給  
事中李瑜劾奏。選等擁兵畏縮不前。東應熊福。不驅  
而犯難。亦何及矣。俟虜自出。豈所宜哉。會侍御黃泮  
亦劾。墻子。備楊巖等。上大怒。命錦衣衛逮選紳等  
拷訊之。應熊等敗虜于密雲。斬首三十餘級。虜亦引  
而北。京師解嚴。上諭博曰。賊滿載而去矣。丁丑。虜  
遯。援兵撤。論功則東報斬級七十九。以應熊爲之首。  
巡按董堯封。上薦兵斬級二百九十九。以郭琥爲之

首。于是樞部叙之曰。胡鎮奮擊于孤山。江東追勦于石匣。大小戰二十陣。醜虜帶死扶傷。痛哭宵遯。誠二百年之奇功。上玄威佐之不顯也。上予陞廕賚卹各有差。是役也。三衛夷爲導詣督臣謂從濱家口而遼誤信之。引銳先注虜乘墻子入。宣大遼皆傾而援之。東西相伏。莫發一矢。會楊縉石玉來援三河。虜遂大掠濱東諸縣無筭。東旣統援兵壁順義。不敢進。待其輜重去。以精騎殿後。諸將望塵而尾之。徐徐以虜爲節。琥預火器待之于鵠子嶺。虜被焚擊。乃別取道。

龍峪磧窯。是時虜屢且疲。失道衆亂。兵法所忌。乃諸將徒取零騎罷弱者上首功。益中國之精良。十七在是。而技能止此。及選紳逮而諸將懼。雖侈捷蒙賞。然本兵竟無消勺及矣。四十三年。東虜土蠻黑石炭等糾萬衆犯一片石。參將白文智禦之。巡撫溫景葵復拒之。攻山海不克而遁。總督劉燾會計日增矣。戶部裁抑之。以五十三萬七千爲額。然燾疏通潮河之水。達于通州。小舟轉粟于密。大省倅運之費。往者牛闖山陸輸誠艱也。昌密之糧起于庚戌。漕總徑運甚便。

後復空干通。吏因緣爲奸。燾請令江北山東二總直。  
運至龍慶石匣。近倉而止。到日卽給通關毋令淹滯。  
漕卒兩利焉。上以邊卒多不用命。欲頒三萬以鼓  
之。大學士階對。春防賞矣。秋防將以爲例。賞之不見  
恩。不賞適生怨耳。不若足其本餉。而賞則畱之以待  
有功。上深嘉之。上諭薊墻久雨所圯亟簡才望  
大臣行邊。于是遣兵侍遲鳳翔。而土蠻界嶺之報至。  
大掠昌黎等邑。時宣亦有黃台吉之報矣。始虜攻界  
嶺入羅漢洞。諸將吳光裕俱無禦之者。而情軍亦遁。

去。以故恣掠遊騎及于灤。越三日。總兵李世忠始引兵至。虜已退李家庄。幾爲虜圍。而策應諸路悉至。虜乃解折而東。出義院口。會天大霧。迷失道。墮崖中。人馬枕藉死者甚衆。諸軍爭割級。而世忠所上多僞者。總按七百二十餘級。上乃降督憲黜撫耿隨卿民。戊世忠陞帥王治道羅錦董一元張臣等賚金帛有差。隆慶二年總督曹邦輔欲令昌永鞏標四營空運近地。免其赴京巡撫劉應節欲改昌平十六州縣爲衛。而部持議不可。應節上言宿蠹之大者。支糧之遠。

也。馬折之嗇也。撫夷之私償也。行邊之煩也。役邊軍而乘戰馬。文吏之刻也。武弁類多貪墨。而繩之太過。勢不得不曲意迎承。以干薦達。雖廝養陪臺。皆厚爲歎洽。一切供億歛之軍中。凡此五難。諸邊有之。而薊爲甚。總督譚綸疏曰。今之策虜者。曰乘障。曰設險。然薊昌東西二千里。卒不滿十萬。率畫地數丈而守。一人虜聚我分。難當一面。說者遊兵破虜。誠長禦。而行之有四難。夫虜長在騎。而我制以車。車戰須三萬人。非有見伍。計從召募。歲費五十萬。司農告匱。一難也。

燕趙之士。數年銳盡矣。非募吳越習戰士萬二千人。  
雜教事。必無成。臣與戚繼光召可立至足可立效。而  
疑者謂使之不可北。教之不可南。慮其有他。是臣兩  
人尚不足信。尚專之任哉。二難也。軍旅務在威嚴。驟  
法必致大駭。流言易生。忠智掣肘。三難也。虜一破再  
破。乃終身創矣。忌嫉易生。不能戮力再舉。奇禍力至。  
四難也。姑就見兵。選爲十枝。枝足三千。列爲三營。一  
營于密。一營于遵。一營于三屯。付繼光以總理。小警  
自禦。大入併力。亦願陛下少逭罪誅。聽臣決一死。

戰以收桑榆之効。此練兵三萬。必欲得鳥銃手三千。  
以衝其鋒。請選浙兵以濟時急。勅遣錦衣衛二官  
往浙募之。令叅將胡守仁李超將之而北。綸又言十  
年來主竟不充。客竟不能。何也。任未專而行未核也。  
請勿使按臣關臣與其事。二年有成。遣官閱視。乃底  
成績矣。御史爭之。亦各有條議。上曰。信地既分。注  
意各異。不行專責。推諉坐視矣。仍分信地。守者首之。  
應者次之。其馬戶抽丁之議。不淮行。于是都督戚繼  
光疏諭薊鎮兵。雖多亦少。之原有七。不練之失有六。

雖練無益之弊有四。何謂。雖多亦少。薦兵不習戎事。  
而好末技。壯者役於將門。弱者僅以充伍。一也。邊開  
逶迤。旣鮮驛遞。使者絡繹。將士逢迎。是參遊爲驛使。  
而營堡皆傳舍。二也。賊至則調遣無法。遠道赴期。卒  
斃馬僵。不救於事。三也。達軍邊軍之戍邊者。散漫無  
統。約束不明。行伍不整。四也。臨陣馬軍不用馬而反  
用步。五也。家丁盛而軍心離。六也。乘障卒不擇衝緩。  
備多而力分。七也。何謂不練之失。蓋虜之所至無常。  
諸將不能分身隨禦。恃乘障卒耳。然恩威號令素不

足以服懾其心。分數刑名。素不足以稽齊其力。故緩急難使。一也。有火器而不能用。二也。棄土著而不練。三也。入衛之卒。嫌於非屬。無有紀律。四也。順天八府之班軍。民兵四萬人。各一心。五也。將以驍勇爲上。然驍勇者。一人敵耳。將既不練。何以練兵。方今注意武科。多方保舉。似矣。此選將之事。非練將之道。六也。何謂雖練無益。夫射打者。軍中之事也。今者徒有虛聲。而實未中的。且一營之卒。爲銃手者常十七。不知兵法五兵。五當長以衛短。短以救長之數。一也。三軍之

士各專其藝。金鼓旗幟。何所蓄。今皆置而不問。二也。弓矢之力。不強於賊。而與賊共之。三也。教練之法。自有正門。美觀則不實用。實用則不美觀。而今無其實。四也。臣又聞兵形象水。水因地而制流。兵因地而制勝。薦之地有三。平易交衝。內地百里以南之形也。半險半易。近邊之形也。山谷仄隘。林薄叢翳。邊外之形也。虜入平原。利於車戰。虜在近邊。利於騎戰。虜在邊外。利於步戰。三者迭用。乃可制勝。廻邊兵惟習馬耳。未聞山戰。谷戰。林戰之道。惟浙兵能之。臣發跡浙江。

思用浙人。有以也。今各區守。哨入衛之兵。及巡撫總  
兵標下兵。各守一方。勢不得總練。惟有總督標兵三  
枝。付臣教練。浙江三千分發十區。在臣標下者數百  
耳。臣無兵可練。何職之能修。况官銜出於新設。邊將  
黨而不協。萬有虞。百口何辯。願陛下更予臣精兵。  
殺手三千。鳥銃手三千。或於西北召募。或就薊鎮摘  
取。須足馬軍五枝。步軍十枝。專聽臣統領。車騎合練。  
軍中所需。皆宜取給。方今朝議紛曉。難於改絃。而  
臣擁重兵。易生嫌貳。請設監軍科道官一人。以督臣。

庶臣得展布而無掣肘之虞也。章下部取回總兵郭  
琥獨任繼光焉。綸奏十二路間或百步內築一墩。計  
墩三千座。每歲可造千座。每座費五十金。此設險萬  
全之略也。上曰是。綸奏報繼光所論兵事。令臣熟  
計其便。謹條于左。一。就近募與。摘見軍之熟便。臣綸  
曰。選區將也。改三協爲副帥也。班軍乘障而外。恤餘  
六千。付繼光練之。既精。更番以發之。勾共兩班。撥改  
選領。而清衛軍多詳于本戶。略于餘丁。應稍更其法。  
僉餘補伍。而勾補逃軍。當法行自近。從順天八府始。

也有行糧之資。無修邊之苦。則應募不乏矣。一車騎合練。可以用否。臣綸曰。兵法易戰。一車當步八十人。一騎當步八人。險戰。一車當步四十人。一騎當步四人。今制兵車七營。分布十二路。卽數萬之虜似無能爲。每營重車一百五十六輛。輕車二百五十六輛。步兵四千。騎兵三千。駕輕車馬二百五十六匹。長戰火器。以車爲衛。行則陣。止則營。不假墩塹。遠施奇出。無不宜之一。鼓舞犒勞其費。安出。臣綸曰。暫令大帥一千二百金。三付帥各六百金。勿令過侈。使其可繼。一

七原六失四弊。何以圖之。臣綸曰。臣得便宜從事者。無諭矣。失之與弊。將不得其人故耳。惟是班軍無制。事緒煩屑。尚專論之。其臨陣調遣二事。如協薊東副總駐劄建昌。巡撫標兵既議屬之。則本標與撫標當兩防之際。俱赴建昌合練。而後當以一營駐建昌。一營駐燕河。以備燕石東西之警。得以就近首先迎敵。次則薊鎮。次則西協。次則昌標。以次而至。薊大帥標兵。駐練三屯。兩防之時。則當仍舊不動以備。馬太松。棚三路有警。卽當先期馳赴。在東則東協守之。在西

則西協守之。次則昌鎮各標兵以次而至。協薊西副總駐劄石匣。總督標兵既議屬之。則本標與督標當兩防之際。俱赴密雲合練。而後當以一營駐密雲。一營住石匣。以備牆子。古北。石塘三路之警。得以就近首先迎敵。次則本鎮。次則昌鎮。與東協各標以次而至。昌帥標兵駐練昌平。亦當仍舊不動以備。居庸黃花鎮邊三路有警。卽當先期馳赴。次則西協。次則薊鎮。次則東協。各標相繼竝至。凡遇遣調。每營各遣騎將各將騎兵二千。先馳赴拒。兵車隨進。本路各要口

把截以待決戰。仍限以日程。軍法無赦。然馬之日耗可慮也。馬死則追椿。椿不足則追棚。棚不足又罰其官至嚴矣。然官懼而匿不聞。反陰收芻菽而賂免之。責之卒而力困。則逃矣。巧立爲均攤冷補之議。或月扣椿價五分者。此錢不得輒用。又以補部議之未終也。俱從所請。綸奏築臺之役。部以簡墩省費。必不能從。三千之名。改爲一千六百座。而流言傳播。臣願請罷斥。上曰。綸其堅持。毋惑人言。侍御劉翹應修省陳言曰。頃見延綏班軍之歸也。一車所載。生居其一。

而襯居其二。憔悴而泣。曰行月二糧非不厚。年例非不時。本折非不足。然而遏于倉攢。漁於將領。勒于家丁。害于主兵之偷逸。歲雖一更。暑雨怨嗟。枵腹困踣至此。上憫之。勅該部悉心以畫。御史傅孟春所陳折支積貯事宜。約每米一石折價七錢。酌地里遠近爲改折之差數。在薊者遠五月。近四月。在密者遠二月。近四月。在永者遠近俱四月。新陳相易。豐歉互通。此並濟之法也。至于馬草十萬解京。則應附近輸納。勿折爲便。少傳博奏。春秋防日。今之論者。咸以守牆爲

怯。言似可聽。而實無少效。夫逐之牆外。猶害七。而利三。奮之牆內。則利一。而害九矣。牆者。先處戰地。而待敵者也。實則戰也。臣博嘗拒打來孫十萬之衆。以爲當守牆無疑也。大學士拱高等議備邊八事。隨宜修舉。以行五年。東西虜約分犯土蠻。從捨刺母林馳令口。把都兒從挿漢腦兒馳古北口。俺答從腰帶馳獨石黃花。御史傅孟春上其狀。萬曆二年。遊擊謝惟能告徹于兵備崔鏞。韓宰曰。西虜青把都方祭旅。譁聲寇遼。而志實在界嶺義院之間。總督方逢時大驚。與

給諫李戴蔡汝賢後先奏記。大略曰。入市曾幾何。卒有此音。殊未可信。第其巢旁東虜察罕。而又以女東桂適長昂。或垂涎于青酉。得西市利。故駕言西虜以逞已好。遂至奪其蓄而固其黨。時或有之。俺答以番書報曰。青把都業已聚兵舊開平。志在寇上谷塞迺日索薊賞云。大司馬譚綸按御史陳文衡奏薦故無此例也。宣撫吳兌使解宗堯及夷使鐵寧往諭。青把都言我來爲欲略朱赤達子。漢使欲絕我貢市。謂我爲亂遼陽。賈利上谷。趨罷兵去。總戎戚繼光雷龍具

以實告。今日爲東邊患者。唯長昂而已。大司馬譚綸  
覆奏。上曰所報虜情前後異詞。東西異狀。通無的  
據。將來何以待敵。暑月饑荒。無端爲虛聲所動。周章  
調遣。先自罷勞。今後各總督鎮巡官居平當戒備。原  
謀探情。有警持重安詳。示以整暇。不許沿習舊套。虜  
未至而虛張賊勢以避罪。虜已退而虛稱斬獲以要  
功。國法不宥。本兵居中亦要沉謀審算。動中機宜。母  
但依邊臣言謾爾處畫。致乖舉措。給諫蔡汝賢亦劾  
張學顏。大約言屬夷則虛張聲以挾賞。將領則假訛

傳以冒功爲陸戰者則曰虜塵不斷綿亘百里爲火攻者則曰烟焰蔽空燒燬約有數千爲水戰者則曰犁沉賊船漂溺殆以萬計皆成套語三年土蠻大會青酋二十萬馳大寧舊城大將軍戚繼光察其情曰屬吏長昂假外父行使已搶掠已耳四年大帥戚繼光重修三屯營城成遷安縣南百二十里卽忠義中衛故地綰轂于居庸山海兩關之中舊城薄而隘修立營廨增盧龍漁陽之重焉夏炒蠻盜我鴉鵠菴邊鴉鵠山者西盡窟窿東盡盧家安楊木頂長可六

里。縣崖峭壁。絕頂一口。以女墻堵之。人跡罕到。東西敵臺皆遠。烽臺半居山下。南兵守之。樵蘇往來。遂成間道。炒蠻歲。稟食古非日。知地形。今霪雨。牆頽。炒蠻窺隙而起。夜半踰口入市。詳言延綏客兵寄宿。殺潘仲文等十人。市皆大驚。烽臺兵覺。鳴砲路將死。宗儒提蒼頭軍百餘人。馳救虜退走。宗儒追十八盤。山百餘里。行至捨喇智。伏虜起圍。遂中宗儒。及兵卒湯克寬。千總高大朝。蘇學奮。救亦被死。副總張臣。徐枝遊擊高廷相。李如梗。劉楫。兵至解圍。引去。臺臣王一鶴。

勅奏事下大司馬譚綸覆奏罰一鶚戚繼光俸三月。  
左遷錢藻張臣以高廷相丁茂屬御史逮問之八年。  
總戎戚繼光聞虜入遼錦川馳援于中前所詔加  
少保十年是時也長昂受賞于漁陽而又從西虜寇  
寧前青把都姪哈不慎受賞于上谷而又從長昂寇  
薊遼兵書梁夢龍給事張希臯楊芳乃議嚴爲之禁。  
風諭三衛母得藉他夷姓之闖入而罷其貢市十一  
年長昂戕我譖人張剛欲阻部夷入貢而董狐狸弗  
用其計竟欵喜峰口長昂捕人于界嶺間自若寇三

山入高橋。小有掠。兵備劉易從拒之。長昂復犯臺頭營。烽至兵備成遜。太帥楊四畏副帥徐從義出禦之。虜奔劉家口。折牆而入。有所掠。遊擊路宰以南兵起烽鳴砲而驅之。虜復盜桃林。大將軍卽陣中斬失律者千夫長李養性周伯珠。長昂去。上依督臣張佳胤議。革黜徐從義。張紹芳而勒總兵四畏戴罪時。上方幸山陵。督臣應扈蹕。有一旨。在鎮住理。免候蹕。小阿卜戶寇黑谷關。遊擊李尚賢壁關中。矢下如雨。虜遺鈞鑛部印。李植行邊。奏記巡撫翟繡裳。罰月俸。

有差。是時臺省馮景隆楊芳等彈文屢至。而虜乘夜殺掠黑谷關。副帥陳文治及李尙賢掩其骸。告諸死者戚屬。母成服。母悲號。御史汪東之按驗得其姦。有旨逮文治尙賢論斬。十二年小阿卜戶挾我賞總督佳胤折之曰。何以謝青把都也。雜以馬蘭路疲于東西矣。不可。青把都馳長昂營。聲言聚兵大寧城老河。屬夷滿都不賴走以告。而小阿卜戶不與俱。乃借端西虜挾我開墻子嶺曹家寨兩賞也。總督張佳胤。御史蕭大亨。如其情以狀聞。日小酉牽制首尾。使我

力分備寡。既不得併勢于東。又不得忘情于西。請捕治其罪。小阿卜戶乃遁去。十三年六月。朵顏酋董狐狸自欵寨下。脫帽跪起甚悲。言向來犯邊。皆東西二虜同名姓者所爲。張家胤讓譙之。狐狸叩頭稱冤。撫實前事。使得奉撫賞。八月。東虜長昂。躡入喜峰口。降罰正佐將吏有差。九月。朵顏酋長昂。遣其母妻詣撫院告歎。刑科臣王繼曾奏。邊臣叙蔭太濫云。十八年。長昂挾賞于喜峰。大帥張邦奇詳許。昂增布帛七千。誘通事張五烈二十五人。至義院口。醉而殺之上幕。

府功。十九年。長昂益憤張邦奇之役。犯大毛山。伏喜  
峰口。射殺我謀者。大帥王保等連兵。生獲小郎兒七  
人。下大司馬議。從。穆廟令甲曰。薊門凡捕獲小酋  
長。及大酋長。如土蠻者。大破賞格重爲陞賚。他塞不  
得引比。乃遷王保等官階。二十三年。長昂屢歲獻所  
擄人畜。邊吏還小郎兒四人。梟阿都三人。而卹張五  
烈等。兵書石星議也。二十五年。擺腰台吉。糾衆近邊。  
總督王世揚言。擺酋經年不貢。每年乞賞。近且聚兵  
欲寇矣。當相機堵勦以示懲。三十年。獐兔撥計二酋。

將寇石門。總督萬世德謀知之。乃于七月出中路捕  
斬八十級。順天巡撫劉四科疏。薊邊撫賞歲費五萬  
餘金。市之江南。價侵貨惡。摹組其面。麻枲其裏。不稱  
權量。夷心未厭。甚有揮刀詬而裂縉。告換愆期。守門  
叢弊。今宜年終甄別。路將與委官著其連坐之罪。三  
癸卯二年御史湯兆京劾奏。薊遼總督萬世德才全行  
險。奸尤濟貪。最可恨者。朝鮮任方重大。天津去遼陽  
不二十日程。徘徊四月。始抵前屯。猶以虜阻上章。希  
復久駐。既以違命逗留。迨倭奴盡去。世德馳入朝鮮。

報捷。世德未曾督陣。何以稱功。又復益功掩罪。出鎮二載。漫無成算。專以塘報塞責。賊穢所至。昭彰執贊不遺下賤。取償轉付諸營。滿載歸來。捐資結納。奏入不報。三十六年。賴蟠二酉跳于三協。叅將李宗剋核太甚。起夷怨心。人犯建昌河流口。劉一藩逗遛不進。紅旗把總傷焉。大帥馬棟舉烽援之而遯。巡按黃吉士。兵科宋一韓劾之。是時虜猶畏杜松名。弗敢深入。云。五月。薊帥杜松傳烽曰東虜稍大成。根根大成。擁二萬于喜峰。我南兵百總何天榮。死于鳴鏑下。松督

朱天煒等。火攻退之。三十七年正月初九日。黑峪口  
夷丁。經過兔兒山。晨炊清河居民。望火光奔竄入城。  
以數萬計。蓋喝于河流口之慘也。京師內外震十六。  
城門一時俱閉。本兵具疏。乞發帑爲備。四月兵部上  
方略曰。東虜故住牧宣之北。大漠之地。至加靖中。虜  
酋打來孫與掩答。盜馬仇殺。遂契所部東從。盡收朵  
衛種族。日番跨三岱。河東西無非挿屬。夫固元之裔  
也。虜酋伯彥罕物故。其子虎墩兔。甫十餘齡。而諸部  
奉之無二心。則殘元之策威尚在。而蒙古之名分猶。

嚴矣。有燉兔拱兔等內輔。而賴暉大憐金兒等爲外  
嚮。欵遼則攻薊。欵薊則犯遼。我之財力疲于市賞。而  
彼之恫疑虛喝。靡不得志。其用物愈私。而操術愈譖。  
門庭至近者。挿漢是也。國初置奴兒干都司。設建州  
海西毛怜等六十餘衛。久之。吞弱噬寡。而建州弘盛。  
夫固金之裔也。奴兒哈赤。以左衛旁支。發憤誅卜寨  
併南關。善假仁佯義。信賞必罰。結宰賽爲唇齒。通西  
虜爲外援。今且垂涎北關。那林。李羅。白羊谷等。已見  
告矣。又聞其招誘朝鮮叛人。習火器。知水戰。將蓄取

朝鮮爲室宅。而外併二關爲門戶。混同之江界日損。  
女直之故智仍存。不在驅略忠夷是也。其余出沒靡  
常。若五路家賊炒苑等酋。則又古山戎之裔。以遼左  
彈丸黑子之壤。而蒙古女直全部裔夷環繞而蹂躪。  
其間又皆方盛方張。自河以西禍起于挿漢。則廣寧  
寧前錦義諸州危。自遼陽以東。禍起于奴酋。則開原  
遼海諸州危。若腹背受敵。夷虜交証。則全遼將非我  
有。而薊門畿輔危矣。給事朱一桂以爲遣使入拱兔  
浹旬不得拱兔面。此虜不急歟也。昔年遣使建酋增

車價。至今悔之。督臣王象乾報曰。去歲夏。朵酉賴暉  
大。長昂之子。句班白二酋犯遼。革賞忿而糾。鑿金兒窺邊  
無虛日。臣今力疾馳薦。差通事虎喇戲出冷口。而賴  
酉已犯流河。東虜挿漢都令復十萬逞矣。虎喇戲回  
言諸夷以革賞聚兵通事入太寧之屠紀營。打不亥  
稍反成在焉。虎喇戲曰。所搗者行賊逆巢也。別賞如  
故。于是虎墩兔憨率部夷領喜峰之賞。黃道中曰。大  
勝堡之役。拱兗爲之。韋宰生曰。稍反成爲之。則宜備  
錦州矣。頃之。莽酉悔過。俛啞拜爲之。請于董家口六

七次服而舍之。此其侯也。夷情通而國體尊。賈和誠所當嚴。而往來終未可斷。若動以遣使爲戒。邊臣益局局矣。三十八年御史金明時閱視已竣。特糾薦帥王國棟。先是順天按李光輝。宣大按吳亮交章論之。有旨王國棟策勵供職。宥過用人。故此寬假還說與他。噫。奸帥之無與援。吾不信也。四十一年正月。滿旦嬖只挾賞于石曹葦子谷。總兵蕭如薰拒之。九月杪花草賞已三年。而遼河間無寧宇。茲者遣九子叩關。願分隘而守。按地而責之。如一年恭順。乃領若。

賞而乃可五路。久不赴關矣。其賞懸之。以酬滾金。阿卜害十五人之數。總督薛三才酌其情。部議報可。昌平道曹愈參曰。黃花鎮舊有河間寧夏車營一枝。乃因修大邊之役。暫撤于渤海。夫舊邊既四十里水峪。迤西坦而無邊者倍之。今渤海大邊鶴子萬澗一帶。已築矣。車營宜復。四十二年總督薛三才以奴勾煖兔炒花宰賽。乞援于薊。莫若止援兵而增募兵。合麻承恩之千二百。曹文煥之千名三屯之家丁。實廢將于其中。共爲新營。所以建威而銷萌。兵部如其議。正

月永平臺頭以乞糧噪于燕河又噪于密雲擐甲滿弓歛血相向時薊餉缺十三萬御史李徵儀請之曰三日而四噪其囂凌者可虞也四十五年虜犯喜峰口巡按薛貞劾參將郭珍等降罰之兵科熊明遇曰近日薊邊張用駢等古北路之戰斬滿旦部六級高策孫顯祖等松路之戰斬駱駝部十八級或暗出烽西或夜渡灤水不可謂非搗巢然駱駝久箋視薊而我人險能脫駱駝胆裂矣滿酋母子狃詐麻郎之戒不可不防倘如故約案亦可結督臣薛三才撫臣劉

日悟所上首功賞僅如許。未若延甘之濫侈也。六年薦督汪可受曰。奴陷撫順而虜攻瀋陽。夷出虜入。狡肆異常。請開破格之賞。廣鼓舞之路。開納級之途。暫停遼人科舉。以殺賊之雄者。賜進士。如雜途之聽選。弁流之替襲。悉准賊功以超之。兵部具議。總督移駐關東。有旨督臣出關調度。事出創見。似難輕舉。既議妥其勅可受。統兵行。於是可受陳援遼之聲實。自四月二十二及五月初十日。僅選薦兵五千。再酌出關之期。合八邊兵而後進。詔曰。母得逞。

。遇時朝論及總督薦遼者可受疏辨之以爲臣轄薦耳其加遼字則勅書相沿之誤臺省文章可受大不敬無人臣禮可受以病還籍七月巡按王象恒奏拙薦助遼共六千四百人精銳幾盡奴不惜多金厚幣深結西虜擾我于市口請于京營戰車營二枝五軍戰兵二營一枝所以壯門庭也部議叅將鮑承先統三千四萬人以往四十七年二月遼左三路喪師滿酋乃壓于馮家谷乞增新賞西協駱駝之子卜答仍踵父智來窺東協則虎墩兔愁傳其二十四部乘

薊之虛以十萬騎恣掠山海間。撫臣劉曰梧急請京  
軍六千爲守。帑十萬金爲資。八月滿旦母子以五千  
人從白馬入分攻高家堡乘我調遣虛也副帥張國  
麒遊擊朱萬良劉登瀛等禦之去時遼鐵嶺再陷虎  
墩免憲遣崔兀榜什等待賞于鎮靜關撫夷官王牧  
民牛酒餼牽有加腦毛大黃台吉甚喜乞箭萬枝白  
金三萬黃金二千與其娘子妹子及弟他不能等枝  
葉不更令牽緩助兵講折十數反乃加賞四萬金總  
督汪可受叙各并勞識者議之十一月西虜那莫賽

同伊母亢邦三恰叩關獻其擄者三人乞三歲之所停賞願認三九之罰而畱其額給者布四百段四疋餘則補之鑽刀而去天啓元年四月總督王象乾行邊張鶴鳴曰西虜萬不可絕惟有撫之一策而已三十六家頭目狹韋大董忽力煖太貴英他不能索只速讓台吉哈那彥不喇度台吉哈那顏蟒金他不能蘇不的尤旦卽素又罕索羅世等擁萬人護邊拒奴列幕垂垂諭王楊嘛喇往曉之自寧遠前屯以西至薊州顏三衛之虜也設立之規原善自寧遠以東至

廣寧虎墩兔。怒。杪花。宰。賽等。元之裔也。部落雖多。而勢不聯。其芝。蕨。灣一帶。積浪荒沙。虜率棄之。運砲于島。護器于堡。如効其順。因而撫之。司馬曰。不武。司農曰。不經。邊臣曰。罪府。然而額賞之外。日迎風。日過夜。日祭旗。日喫食。頭緒正多。括軍貼民。隱憤含怒。或有風聞。朝議卽以一切文法隨其後。而虜情携。邊局壞矣。二年九月。奴兒悉山海之有重兵。欲假道于插漢兒。犯我喜峰。而西虜駱駝之男卜答。冀復舊賞。東虜哈喇慎。及罕煖二酋。亦赴喜峰大口。藉機要挾矣。撫

李瑾督王象乾。請備之。經略王在晉報虜情曰。西虜以慾爲主。而東夷亦視之。故講賞爲慾之鉅費。而貴英哈者虎酋之伴臣。其部曰朗素。則猾稽貴重奉慾之令。索三季賞。拒之曰廣寧賞地何在。已而索王猷賞。拒之曰猷何在。已而索舊撫馬價。拒之曰馬何在。酋不能難。卒聽張喇嘛王桑吉爲之盟。奴兵到。慾兵不到者罰一年兩季。計二十萬金。又有錦州大廣堡。開元鎮安堡之賞。屬廣寧。高台堡之賞。屬寧前。又反青雖係慾族。而不與慾同賞。抽扣爲最悍。與拱兔反。

青爲一黨。奴亦多金購之。我歲額不能勝也。哈喇慎白顏台吉原非薊門之虜。乃罕索羅窺我之弱。顧要之五路妻子。爲貴英所占。五路憤而投抄花。抄花不能養奴。用之守廣寧。而遷其降者于海蓋。此皆可虞。故欵者縻之。戰守者自強之也。十二月行邊。尚書王象乾報車營之制。車兵三營。營各萬二千人。密護陵京薦援山海永專出關外。列四壁。用鹿角車八十輛。共三百二十輛。壁環八門。每門屏以偏廂車三輛。共二十四輛。中權出奇。獅虎車八輛。輜重四輪。獨輪。

車四十輪。合之爲車者二百九十二輛。以共計四壁鹿角車及八門偏廂車。每輛用兵二十五名。共用兵八千六百名。中權獅虎車。每輛用兵二十五名。輜重車每輛用兵十二名。共用兵六百八十名。又各將家丁。及各局百總。共二百名。合之爲兵九千四百八十名。御史梁之棟曰。頃見閣臣孫承宗慷慨當關。纔兩閱月。汰將吏。嚴賞罰。練兵馬。辦營房。閭閻不擾。烽燧不鳴。久任責成。方可奏效。而種種無稽之言。亂人視聽。市虎末就。曾杼已投。揣摩牽制。無益成敗之數。則

言語省而精神合。所爲在廷諸臣望也。吏科阮大鋮曰。共安樞輔之心。合奏樞輔之手。乃克有濟。二十四日巡撫岳和聲曰。兵家之要。無過正奇。約以三言。曰分。曰合。曰誤。如津。如登。如鮮。之爲正。爲奇。爲分。爲合。爲誤者。不具論。關之上。關之外。中前所。前屯衛。塔山。杏山。以往爲正。而關之內。自薊密抵永鎮。三協兵馬。爲十二路守口計者。屢屢以防禦沿邊。而時虞挾賞。之西虜。東而山海。自紅花舖。深河蘆峰。以及撫寧。西自陰舖雙望。以及蘆龍。凡一百七十里。皆關內正兵。

處也。絕無一旅爲救。爲寒心。僅就舊額標兵三千六百人。議建忠武營。益餉補額。酌製龍驤車一百二十輛。接八陣兵法。都爲車營。具申督師閣部委袁驥董率團練。爲水鎮正兵第一枝。自盧龍至撫寧蘆峰。十里爲吳官營。凡八十里。山峻而氣聚。又二隘地也。僅將宋士英統練沈閣臣南兵四百名。汰去驍健三百戍守。益以通判柯仲爌募練李一鳳所統兵二千人。益補募叅將劉爾化。統領徐詹翰民兵。近爲臣所汰革七百名。合士英者三千。爲威武營。以西接蘆龍。

爲正兵第二枝。自撫寧至榆關二十里爲深河。凡四十里可旁走樂亭昌黎深豐之間。不經永平直抵昌通其地高而勢漫。又一支地也。北至駙馬寨二十餘里。僅將米元良新兵二百戍守。而距深河尚遠。將賈祥前所募兵。爲叅將黃調煥。統防黃花鎮二千五百名。合元良者三千。都爲宣武營。以東接山海爲正兵第三枝。關內之陸奇兵。在一片石義院口也。杜應魁領之。關內之水奇兵。在月坨牛頭崖海口。奏王島三處也。津門直沽諸艘鱗次以待。以董大勝領之。三年

正月總督王象乾告虜貢之責成。曰哈喇大酋罕索羅勢有犯冷口桃林意。帶甲者二萬方憂兩河。又虞三輔贊畫主事鹿善繼謀之。遣都司閻守信守備王擒胡往諭之。西僧王喇嘛化導之。色動脫帽遷帳。請自發所部窮廬二百戶。令三衛酋長狹量大煖太朗素速不地。益以穿廬千幕保塞護關。虎墩兒。憲遣貴英哈來。臣親撫之。比聞奴兒。不惜斗金斗珠。購都哈卜瓦吉長子爲婚。廣寧之西爲永子反。反青之西爲洪兎。洪兎之西爲抽扣兒。使都令折而入奴。則洪抽必從。

其派強可奈何。多方招之。哈喇大酋伯彥台吉暨罕遠羅跋及卜喇兔俱至。願負弓矢而增吾障。于是抽反昂洪七部亦齊聲而叩喜峰。抽則助防中右。洪則助防錦義。昔之備西酋者。今借之以備東奴矣。天津巡撫李邦華陳行間實務略。一曰定兵志。二曰束兵身。三曰嚴兵律。四曰理兵械。五曰分操練。六曰嚴逃補。七曰重將權。八曰旌義勇。九曰杜占役。十曰修馬政。已行者如農之有畔。欲行者如農之望歲。然關御史潘雲翼閱其所區畫。所鼓舞。深服其精練云。二月

天津巡撫李邦華議曰。鎮海前後三營四千人孫應奎足領之。左之武林有實宜裁。大沽者樓船刀斗之所也。去津門百二十里。戊戌間曾設備倭都司于此地。事平乃撤。今合三爲一。壯波臣之援。津所轄南北海界。南盡鄭家溝而起。口爲適中。駐之以江南營。北盡馬頭營。而黑洋河爲適中。駐之以舊營。指臂相應矣。旅順三岔片帆直掛。則樂亭之馬頭營。灤州之艮行柳。冲區也。或以月陀爲出入游衍之地。則聲靈益鬱於海外。或以秦王島姜女坟爲上下偵探之所。則

呼吸嘗通於咫尺。斯弗驚于遠矣。三月津撫李邦華  
曰。津門之急關門也。翟子勲以二千人。劉永昌以三  
千人悉赴山海。雖曰津有標正二營。殊新附未堪用。  
然春防之設。亦更番之而已。十一月朔巡撫張鳳翼  
塘報。叅將王楹採樵于仙靈寺。不意溝內西虜起而  
爲構。遂乘不備。戰于小園山。楹力竭而中于刃。李來  
春馳救之。與尸還。巡關御史潘雲翼曰。香餌金縉。有  
加疇昔。三十六營之羈羈。胡以決齧在瘞哉。撫夷官  
王牧民朱梅王之棟責將安辭。巡按彭鯤化曰。撫西

虜所以禦東夷。使不爲夷用。爲我用也。乃我方借虜以禦夷。而虜反借夷以挾我。我不敢殺一虜人。惟恐壞我撫局。虜乃時殺我漢人。全不懷我好音。是虜以撫愚我。而我以撫自愚也。兵部覆樞輔飭撫之議曰。樞輔深鑒用虜之爲虛着。撫虜之爲實着。算撫之地。定撫之額。主撫之官。講撫之使。防撫之兵。蓋其慎也。市場宜分。息羣狺也。坐門宜遠。廣哨探也。先年三衛在薊。而市乃在遼。無亦迂踪以綴其變。而李來三貢入雲中。則有戒滿蠻之附居塞下。則有戒革干之乞。

大寧廢城。則有戒。豈謂今日不然。則越界者法無赦。  
况同地乞賞。尤易生心。大部種貴。則犒豐。餘亦得免。  
而飼鼠革除。應著爲例。新增更白其因。則踰格者法  
無赦。兩河告潰。成格莫稽。倚一二升爲關說。以低昂  
爲規矩。一部而受數市之賞。一賞而分數等之格。勞  
者乞恩而要挾者亦聽。老者乞襲而嫁娶者求添。卽  
白馬關之役。守弁釀金而踰其分。獵月糧以貽賞榼。  
而卸罪于汪燒餅之一部。則弁流私許者法無赦。夷  
畱我漢人者。轉相鬻貨。更有不法。則何棟計擒哈丹。

許論捕斬白通事之例在也。至撫勦互用之法。則先朝有行之者矣。分五路兵以蕩虜巢。而后蕡其罪者。永樂間事也。選三千人以練其酋。而後許自新者。宣德間事也。分兵三路。大創三衛。而反貽導虜之隙者。正統間事也。顧兵力何如耳。四年四月。桑阿寨下小瘴癠。以丙辰狐山之犯。孫顯祖斬其二十一首。特索夷命爲詞。撫臣鄧渼曰。我末之前聞也。駱駝死而卜答復其賞焉。亦未聞所謂捨蘭兔也。今小瘴癠欲冒駱駝而代償其命。捨蘭兎欲冒卜答而分其貲。則

扶同之當拒矣。

職方氏論曰。帝不襲禮。王不沿樂。我明據北邊而建萬國。龍旂御于大漠者四矣。光被重華。幾及歟。將取姑與。豈慮割大寧者。竟折大寧也。開國以前治外邊。靖難以後治內邊。夫邊不日舒。則日縮。薊之縮也。以遼而吭。以上谷而肱。以盧龍而背。徙都司。改興營。三十年而有土木之釁。則三衛乃狃伏乘其墉。於是大帥遊徼。錫以大長秋。指多而視者眩矣。易曰近而不相得。凶或害之。悔且吝。巍巍帝階。穹廬偏處。爰

及正德花當把兒孫之屬族衍日蕃。權幸者斬遼金來松林百萬殆盡。庚戌之變謂之何哉。夫八區三協制綦縝矣。南臺列堠必稱戚將軍。然黃草溝之役兩出而兩失利。將將者固益之久且專偶其轍亂不損于城也。潮河川殘元避暑故道與古北喜峰俱天險。然歷考金人起遼東。顧西拔大同。由居庸入遼人起遼左。亦由宣大入于居庸。元人起和林。于開平甚邇。亦不由古北諸路。乃南取宣大。由紫荊入。而南攻居庸破之。豈所謂鄧艾入蜀。不從劒閣。尙讓入陝。不從

潼關耶。丘

濬

楊

守

謙

之論。

飛狐故道。

懼其突而阻。

吾漕。

近乃汎運草豆。

飼馬諸徭。

疲吾民力。

其何以堪夫。

三關四鎮與京營相表裏。

暨春秋入衛。

而齊豫晉趙莫。

不簡驍健聽止齊焉。

控弦內外。

何啻五十萬爲雄。

乃

折班銷銳于版築。禁旅替弱于周廬。勤尺牘而盈謫書。侈苞苴而投倖竇。勿謂金繒可恃。竊恐三十六家者。不戒以孚也。

祖宗朝先大創而後綏之。故能好以衆暇且整。延至中葉。則曰虜匹馬不入爲首功也。

將吏相要約。捕虜者抵于殺人之罪。采薇之薄伐。不

足諷乎。今遼聚天下軍實似可。比賴薊宣間而殷憂。  
孔遑當申百里住牧之禁。曰凡入吾圉百里內者。搗  
巢勿論。陽尊其名曰撫。如故陰破其情。而倡邊人之  
敢心。庶幾其有起色。天津爲漕咽喉。增設叢牙以備  
倚不淮撫若。以車騎不薊撫若。猝然有急。則兼之意  
者齊魯之德營。兩河之磁營。新立之通營。昌營足以  
制其犄勝。要之力祐京營之敝。億人勿億。心其一心。  
雖君子六千。橫草左賢王可也。奚慮神州財盡。

全邊略記卷之一

終